

程

休復居文集

附一卷

寶山毛嶽生生甫

元書列傳

后妃列傳

昔者先王慮女寵之無節名分之易奸于是定位號修德業所以正情欲懲凌替風化天下也然而後世王者競隆色選緣飾嬪御之文掖庭增廣或盈千百而所謂德業位號者徒爲後宮矜媚譖害篡奪之階何哉及余觀于元世更不能無惑焉元世寵者皆曰皇后次日妃子皇子多稱太子王女亦名公主至于妃匹之間無嫡

庶之分無尊卑之辨倫序失次貞渝交列中葉後始事
冊立告廟而竝匹如故昔之禮坊文物寢微闕矣然其
后妃或間驕恣阽危遺文卽闕譖害篡奪之謀絕少豈
果先王內官之制不足爲後世宮壺表率哉夫呂后武
韋之禍不世出而人主溺情愛淡聰蔽宦官誘之于中
外戚震之于外內外交訏不待臨朝稱制而宗社移矣
元法內庭給事多用貴臣子弟又統以大臣宦者無權
後順帝始尊用敗壞至外戚世家惟守藩封食租賦奉
朝請而已此所以中宮數撓國柄不遽傾覆者爲治之
少得其道也雖然當太宗定宗之世國無君者六年災

荒民饑諸王爭立上都大亂宋以積孱不敢以一騎一
兵渡淮而北逮昭獻擁立秉政貽謀一失禍害相尋者
三世然則元之得以并吞四海久而後亾者又有天幸
焉矣由是言之除其內蠹防其佚思由先王之典禮簡
求婉哲無滋怨曠肅雍珩璜恭承宗廟于以職業明懿
羽儀宸極且使一代理王者宮闈制度無野史之譏豈不
盛哉而惜乎元世諸君知不及也元法旣止有后妃二
等帝母曰太后祖母曰太皇太后視前代獨皆立院使
主食邑賦稅餘惟歲賜無他爵秩順帝始有妃嬪才人
之稱度或附會卽有亦未著令甲無可錄者其始居塞

外無城郭宮室凡帳所屯曰斡耳朶眾則數次太祖因
以后妃隸焉其名至世祖朝未改又所云斡耳朶者兵
衛財畜厯世附益多雷朔方旣領以皇子間詔其帝后
妃守之大約視漢唐充奉園陵故事此一時之制不可
闕也舊史后妃諸傳頗舛漏又別爲一表益繁無當用
刪列傳前後并稍稍增損其文云

烈祖宣懿皇后斡勒忽訥氏諱訶額倫先爲蔑兒乞部
人赤列都妻赤列都娶他部御歸至斡難河烈祖出獵
見后美劫得之生太祖合撒兒合赤溫鐵木哥三王帖
木倫長公主烈祖崩太祖甫九歲部眾多歸泰赤烏部

而俺巴孩合罕夫人斡兒伯與莎合台方禰弗召已不
歸胙后往責之二夫人怒明日移帳去遂絕時近侍脫
朶延吉帖兒謀叛附有察刺合者與烈祖同族而臣於
烈祖堅止之乃曰淡池已涸堅石已碎畱何爲刺傷其
背帥眾行后疾騎持兵追還大半後卒叛往太祖少長
又爲泰赤烏部所虜幾死后英武仁惠有智略從危險
傾覆中撫長太祖等九亟復仇輒參決軍旅太祖爲合
罕后爲太后時札木合以釁怨合十三部來攻太祖亦
分部人爲十三翼迎擊太后與諸王爲一翼以戰其後
數年太祖破札木合還遂以兵擊泰赤烏部滅之始太

祖與札木合脫里攻破蔑兒乞部又去札木合時夜行過泰赤烏部其部驚走及征塔塔兒主兒乞兩部于營中得嬰兒四曰曲出曰闊闊出曰失吉忽秃忽曰博爾忽太后皆母養成之四人後皆驍勇善戰佐太祖開國博爾忽爲四傑一尤有功知名太祖卽尊位分太后與鐵木哥百姓萬太后意不足而察刺合子蒙力克有男七人中有子亦名闊闊出爲巫號帖卜騰格理兄弟皆恃寵恣暴嘗扶合撒兒合撒兒素勇猛入訴太祖方怒轉諂詰其懦退不敢見闊闊出復假爲神言後當嗣爲帝密勸亟誅于是遂夜召執之曲出遽白太后用白駝

駕車晨馳至太祖帳中譙讓太祖慙懼乃釋尋陰奪前賜其百姓二千餘太后滋不悅太祖幼時與異母弟別克帖兒爭漁獵輒欲害之太后每以始祖昆弟不親愛爲戒弗從一日與合撒兒射之死太后以救不及尤怒責焉二年崩世祖至元三年定廟制世次追上尊諡祔烈祖爲太廟第一室

太祖后妃三十餘人孛兒帖大皇后忽魯渾皇后闊里朶捏皇后脫忽思皇后帖木倫皇后亦憐眞八剌皇后不顏渾秃皇后忽勝海妃子爲大斡耳朶忽闌皇后合兒八眞皇后亦乞刺眞皇后脫忽茶兒皇后也眞妃子

也里忽秃妃子察真妃子合刺真妃子爲第二斡耳朵也遂皇后忽魯合刺皇后阿失倫皇后秃兒合刺皇后察合皇后阿昔迷失皇后完者忽都皇后渾魯忽歹妃子忽魯灰妃子刺伯妃子爲第三斡耳朵也速干皇后忽荅罕皇后合荅安皇后斡者忽思皇后燕里皇后秃干妃子完者妃子金蓮妃子完者台妃子奴倫妃子卯真妃子鎖兒合妃子爲第四斡耳朵元初襲遼制名帳所屯曰斡耳朵因以后妃繫焉又有八不別及妃子太祖滅乃蠻部納塔陽母古兒別速俱失其所繫其中諡號氏族行跡始末可略考見者四人餘多闕

太祖光獻翼聖皇后翁吉刺氏諱孛兒帖父名特因賜號薛禪故名特薛禪帝幼時烈祖攜往舅氏家乞婚與特薛禪遇特薛禪固奇帝儀觀英偉又夜夢白海青挾日月飛集其掌心益喜爲祥遂以后許帝畱止其家烈祖將崩使蒙力克召帝還帝後從泰赤烏部脫歸乃以后歸帝與其妻搠壇送至帝家未幾帝爲蔑兒乞部夜襲破掠后去當兵至有媪豁阿黑臣聞兵馬聲震動亟呼太后帝與諸王起乘馬逸后無馬媪藏后牛車中策疾馳比明至山隘軸折爲所獲帝尋與脫里札木合合兵追擊得后與媪札木合素厚帝亦重德之且恃其

強意無他屯其地歲餘札木合內忤反復后聞其與帝言有異慮加害趣帝悉行已而部眾尊立帝爲合罕摧滅札木合諸大部遂卽皇帝位六年帝征高麗納其女察合軍於國左右后閒使問起居且曰部無他異惟海青孚雛於娑羅今巢凡木爲花豹所破鴻雁孚雛于葦塘比鷲廬陰爲白爪所傷帝遽引兵去復伐金與他部帝旣納高麗女慮后愠將還使侍臣從容私白后無幾微怨懟辭氣懾愉以帝布神威闢疆宇臣妾眾多稱慶帝大悅益賢后先是闊闊出譖害合撒兒賴太后救得免後鐵木哥有眾入其部使索勿與轉答辱之自往問幾

執掠跽謝乃已明日泣告帝未發后聞愀然曰帝在而小臣驕橫無忌辱帝弟百歲後其知畏憚帝子孫乎帝因聽拉殺之后明識善斷能讓持大體故尤爲帝所重生太宗朮赤察合台拖雷三王太宗次三崩年失后弟按陳以武功起家從帝平西夏斷潼關道取回紇尋斯干城前後凡三十二戰翁吉刺部初附札木合後札木合復會十一部來攻特薛禪亦閒使告變帝與脫里構兵其部先降而按陳又有功於是賜號那顏尋封河西王賜銀印統其部別授萬戶領其所俘且詔世爲婚姻成宗朝追封濟寧王諡忠武封其妻合眞爲妃仁宗時

又進封魯王子幹陳後尙睿宗女也速不花公主號魯國大長公主納陳尙帝女孫薛只干公主唆兒火都先以功帝授千戶賜塗金銀印及金銀字海青圓符五驛馬券六其符券至世祖時始詔上子阿哈駙馬失其主名事憲宗攻破宋徐州有勞襲千戶惟按陳次子必哥無官而其曾孫丑漢尙王女台忽魯都公主仁宗朝封安遠王以兵守莽來按陳第二曰忽火曰冊忽火孫不只兒尙王女幹可真公主冊在帝時官王傅府蒙古罕站千戶子合兒合孫平金有功亦賜號拔都後其孫都羅兒至元四年以銀印封懿國公凡翁吉刺女爲后者

十八人自按陳爵爲王其後襲封者八人尙主者十一人帝嘗賜按陳等上都閒地後錫益廣食邑至隸三路得署私臣爲王官主其租賦官吏頒入歲盈巨億萬終元世尊顯莫竝多見此傳與公主傳而實啟於后世祖至元二年追上尊諡曰光獻祔太祖廟武宗至大二年加諡翼聖

太祖忽闌皇后兀洼思氏蔑兒乞部人父曰荅亦兒兀孫其部有三氏脫黑脫阿爲兀都亦惕氏台荅兒麻刺爲合阿惕氏其一后父也皆居薛格涼河閒名爲三種蔑兒乞始烈祖奪脫黑脫阿弟也客赤列都婦其部後

襲破太祖因以翁吉刺氏后與其弟赤勒格兒帝用尤
怨毒旣滅合阿惕氏種窮追脫黑脫阿誅之復命將斬
其二子忽都赤刺溫於垂河而以忽圖妻賜太宗當脫
黑脫阿敗時后父先降將納女於帝兵亂道阻與帝使
臣納牙俱來納牙周慎止后途中三日帝大怒將加罪
后力自陳旣幸知其不欺乃釋納牙納牙先臣於泰赤
烏部帝征時與其父執塔兒忽台來降旣而縱之自歸
請罪帝以爲義後命爲中軍萬戶后最有寵帝征回回
部數年皆從云

太祖也遂皇后塔塔兒部人其後以部爲氏父曰也客
扯連始帝克其四部時納后妹也速干爲夫人有寵夫
人因言后色尤姣麗勸帝於部中求之帝曰若得汝姊
汝能爲之下乎夫人許諾已而后至夫人遂以位讓之
尋封爲后而也速干復爲夫人一日帝讌軍中后與夫
人侍后臨觴歎息帝覺令軍各歸部中一人倉皇莫適
執詢之乃后前夫也帝命戮之而寵后如故后嘗從征
十四年帝將征回回部后請曰兵戰凶事帝遠涉山川
諸子行將兵他征一旦不諱誰爲嗣者願以告部眾帝
大驚曰此大事諸子親臣莫有言者微汝幾忘由是遂
定立太宗久之從征西夏帝道獵騎爲野馬驚墜違豫

后欲班師以訪諸王大臣有脫侖者與后見合力勸帝還帝征回回部時以西夏先款附徵兵勿與語多諷始議伐之至是慮師還示弱生心遣使辭讓復請戰帝怒遂攻滅其國初后與脫侖諫帝雖不從而心以爲忠既克乃厚賜脫侖命斬其主盡以其國人賜后是年帝崩塔塔兒部與帝世讐始拔其部欲盡殺其男子后父也客扯連刺知以告其部復叛尋滅殺傷相當后父亦死事見別里古台傳后妹也速干後亦封爲后

太祖合荅安皇后遜都思氏秦赤烏部人帝功臣赤老溫妹也父鎖兒罕失刺初帝爲秦赤烏部所獲將加害

逃至其家藏羊毛車中赤老溫令后守之卒脫帝難后有功焉事見赤老溫傳帝爲合罕時擊破秦赤烏部后逃山谷中軍行過其下后望見亟呼帝名帝使人問之曰我合荅安也夫爲軍所執將殺冒死求救帝遽令釋之已死乃以舊恩納焉

太宗孛刺合眞皇后失其氏無子諡闕

太宗昭慈皇后乃馬眞氏諱脫列哥那號六皇后先爲蔑兒乞部忽都妻事帝生定宗闕端闕出合刺察兒三王闕出伐宋薨於師其子失列門帝嘗撫於宮中稱太孫命嗣立帝崩后召耶律楚材問之楚材曰此非外姓

臣所敢知自有先帝遺詔幸行之后不從遂稱制於和林者四年及子定宗卽位而朝政猶出於后事見帝紀定宗崩憲宗立遷后與蒙都哥於闊端所居地西蒙都哥闊端子也至元二年后崩上尊諡祔太宗廟

太宗昂灰二皇后失其氏初太宗在潛邸以憲宗爲子命后撫育之後后自生子曰合失早卒太宗又有乞里吉忽帖尼三皇后禿納吉納六皇后業里訖納妃子其氏皆失后無子妃生合丹滅里二王

定宗欽淑皇后海迷失氏諱斡兀立帝崩后抱太孫失列門臨朝聽政者二年初太宗旣養憲宗爲子行幸常

從一日天大風入帳殿太宗命憲宗坐剝上撫其首曰是可以君天下他日又用特按豹皇孫失列門侍進曰特按豹則犢將安養太宗以爲有仁心可爲君乃更屬意憲宗長用命歸藩邸太后旣舍太孫立帝至是后乃挾太宗舊命擁以稱制而諸王大臣不服遂共推立憲宗事見紀憲宗立二年后與失列門母厭禳事覺乃遷失列門於沒赤脫地而賜后等死至元二年追諡未祔睿宗顯懿莊聖皇后克烈氏諱唆魯忽帖塔尼太宗母弟拖雷妃憲宗世祖母也父札荅紺孛克烈部長脫里弟先降太祖從征蔑兒乞有功後歸其部脫里欲害之

奔乃蠻及克烈部破同乃蠻蔑兒乞來侵爲別將木赤台所俘獻女請成太祖乃納其長女亦巴合而以妃賜拖雷後復叛命木赤台襲殺之遂以其部曲與妃姊亦巴合賜焉憲宗卽位尊皇考爲帝廟號睿宗尊妃爲皇太后二年崩睿宗又有妃乃馬真氏曰馬一實生王撥綽睿宗十一子自二帝撥綽外其母氏皆無考世祖至元二年追上尊諡曰莊聖祔睿宗廟武宗至大二年十月加諡曰顯懿三年十月上玉冊云

憲宗貞節皇后翁吉刺氏諱忽都台特薛禪孫忙哥陳女也早崩至元二年追諡祔憲宗廟后初崩帝卽以其妹也速兒繼爲后

憲宗出卑皇后失其氏八年從征宋帝畱后居六盤山而自進攻明年秋七月帝崩於釣魚山九月后亦崩憲宗亦乞烈氏皇后諱闕昌王孛禿子鎖兒哈女也鎖兒哈尙太宗子闕出女安禿公主后爲主出其親屬勳系見公主傳帝又有明里忽都魯皇后泰定二年詔守班禿營帳太宗嘗爲帝娶火魯刺部女火里差爲妃後亦稱爲后不知所終二后氏亦失

世祖后妃十人帖古倫大皇后爲大斡耳朵察必皇后南必皇后爲第二斡耳朵塔刺海皇后奴罕皇后爲第

三幹耳朶伯要兀真皇后闕闕倫皇后爲第四幹耳朶
又有八八罕妃子速哥荅思皇后撒不忽妃子幹者思
皇后兀魯忽乃妃子皆不知所繫而速哥荅思皇后泰
定三年嘗詔守世祖幹耳朶云

世祖大皇后翁吉刺氏諱帖古倫魯王按陳孫脫歡女
也諡闕崩年亦失

世祖昭睿順聖皇后翁吉刺氏諱必察魯王按陳女也
侍帝潛邸生太子真金帝卽位中統三年立爲后至元
十年三月授冊寶元世冊禮自后始也尋上尊號曰貞
懿昭聖順天睿文光應皇后后性仁明通達事機當憲

宗時帝以母弟奉命南伐軍鄂州而憲宗崩於蜀帝異
母弟阿里不哥守和林遂與其黨阿藍荅兒謀篡立乘
傳發兵去開平僅百餘里后使人問曰發兵大事太祖
曾孫真金在何故不令聞知阿藍荅兒不能對尋聞其
黨脫里赤至燕南僉民爲兵乃密使馳報帝亟還始定
后居中宮尤樂簡素隨事諷諫多裨國政有四怯薛官
請割京師城外地爲牧場奏可以圖進后欲諫至帝前
乃先陽責太保劉秉忠曰汝漢兒明達者言則主聽何
爲不諫初定都時以地牧馬無不可者今軍民分業已
定奈何奪之帝默然其事遂寢后嘗取太府繒帛各一

帝戒曰此軍國所需非私家物何可輒取也后自是率宮人親執女工拘諸舊弓弦練之緝爲紬製衣其鞞密可比綾綺而宣徽院羊膺皮舊棄無用后乃合縫爲地毯不使廢敗先是帽無前簷帝出射苦景炫目后乃勑益之帝喜命爲式又製一衣前有裳無衽後長倍前無領袖綴以兩襜名曰比甲以便騎射時多放效焉十三年宋平幼主入朝大宴眾皆歡甚后無愉色帝曰今江南旣平兵戈浸息眾皆喜爾獨不樂何耶后跪啟曰自古無千歲之國毋使吾子孫及此幸矣帝又以宋府庫寶物陳列殿庭召后省觀后旣視卽去帝遣宦者問后

欲得后曰宋人貯蓄將以遺其子孫其子孫不能保而歸於我我又何忍取耶宋太后全氏居大都不習風土又甫至其故宮人安定夫人陳安康夫人朱與二小姬夜縊死帝命斷首懸其第中意極驚怖后嘗乘閒三爲請令南歸帝曰爾婦人無遠慮若使還江南浮言一動卽難保全非所以愛也誠愛之時存恤令便安可耳后用益厚待之翰林待制王思廉嘗進讀通鑑至長孫皇后進諫事帝令內官引至后閣前講陳其說后曰是誠有益聖衷後宜時擇善以進母爲繁詞瀆上聽后用心尤慎密善測帝意如是十八年二月崩在位二十年成

宗卽位追上尊諡祔世祖廟

世祖南必皇后翁吉刺氏納陳孫仙童女也至元二十年納爲后時帝春秋高后繼守正宮頗預政柄大臣每不得見帝輒因后白事焉生皇子鐵蔑赤崩年與諡俱闕

裕宗徽仁裕聖皇后翁吉刺氏諱伯藍也怯赤又諱闊闊眞皇太子眞金妃成宗母也先是世祖出獵道渴至一帳房見一女子緝駝茸從求馬潼曰馬潼固有之但我父母諸兄皆不在我女子難以與汝世祖欲去又曰我獨居此汝白來去於理不宜我父母卽歸盍姑待之

須臾果歸出馬潼飲焉世祖旣去歎息曰此女倉卒知禮若是豈非佳婦耶後諸臣請擇太子妃俱不當上意有老臣嘗從獵知此事且聞未字具白世祖大喜納爲太子妃妃性孝謹善事中宮起居服御無纖介煩猥不至世祖每嗟稱爲賢德婦一日世祖幸視太子疾見牀第間設織金臥具世祖責曰我嘗以汝爲賢何奢如此妃跪荅曰常時不敢用今以太子病恐侵溼氣乃陳卽時撤去成宗卽位尊皇考爲帝廟號裕宗尊妃爲皇太后設太后官屬置徽政院後院官有受獻浙西田七百頃籍位下后曰江南率土皆國家所有且我一寡婦人

安用是耶卽命中書省盡罷易其受獻者太后有弟旣朝求官太后不悅曰汝非其人也勿以累我弟果黜大德四年二月崩在位六年上尊諡曰裕聖祔裕宗廟葬先陵至大三年十月加諡徽仁裕宗又有安真迷失妃子無子氏闕太后爲太子妃時御史中丞崔彧從國王木華黎曾孫世德家得玉璽文曰受命於天旣壽永昌因緣以上及成宗踐阼遂手授焉太后長子曰晉王甘麻刺生泰定帝次子曰荅刺麻八刺生武宗仁宗雖神器代易間陵替失序而入繼正統罔非裔胄其符已先見云

成宗貞慈靜懿皇后翁吉刺氏諱失憐荅里斡羅陳女也侍帝藩邸爲元妃生子德壽帝未卽位薨武宗至大三年上尊諡祔成宗廟

成宗卜魯罕皇后伯牙吾氏駙馬脫里思忽之女元貞元年立爲后大德三年十月授冊寶時帝多疾后居中用事然頗信任相臣哈刺哈孫舉措不撓號爲綏靜八年正月地震平陽后召平章愛薛問曰災異如此殆下民所致耶對曰天地示警於民何與后潏然之京師嘗建天壽萬寧寺中塑祕密佛形象詭藝后幸寺見之惡焉以帕蒙面尋敕毀去羣臣欲上尊號帝不許后閒自

請帝曰朕病日久國事多廢不舉奚以此虛文爲耶議遂寢后用事久頗專制十年貶帝兄荅荅刺麻八刺元妃與其子愛育黎拔八達出居於懷州而妃長子懷寧王海山方總兵居朔方明年帝崩無子后恐其兄弟立修怨乃召安西王阿難荅至京師謀立之丞相阿忽台等遂欲奉后垂簾聽政遣師斷懷寧王歸路而哈刺哈孫已密報懷州愛育黎拔八達先入以計誅阿忽台等清宮禁使迎其兄是爲仁宗既殺安西王并構后以私通事遷居東安州尋賜死成宗又有乞里吉忽帖尼皇后氏失

順宗昭獻元聖皇后翁吉刺氏諱荅吉魯王按陳孫渾都帖木兒女成宗同母兄荅刺麻八刺元妃武宗仁宗母也大德間成宗不豫成宗后欲專政忌仁宗屬近與妃俱遷成宗崩仁宗自懷州奉妃還京師入內哭復出居舊邸朝夕入奠陰平內難迎武宗卽位先是妃以兩帝星命付陰陽家問所立對曰重光大荒落有災旃蒙作噩長久重光大荒落者武宗生年旃蒙作噩者仁宗生年也妃意更惑欲武宗讓位於弟遣近臣朶耳密告曰汝兄弟皆我子豈有親疏陰陽家所言運祚修短不容不思也武宗不從使康里脫脫還報乃更趣召事見

脫脫傳既立尊皇考爲帝廟號順宗尊妃爲皇太后是年冬朝於隆福宮上皇太后冊寶至大元年三月爲太后建興聖宮當武宗鎮守邊陲太后嘗以振旅親禱於五臺山明年正月遂復幸修佛事荅靈貺武宗亦孝敬無方輒殫崇禮志用詔高麗王璋從侍鑾輅備宿衛四月復立興聖宮江淮財賦總管府主輸入三年又以興聖宮鷹坊等戶四千分處遼陽建萬戶府統之是年十月率皇太子諸王羣臣朝上徽號曰儀天興聖慈仁昭懿壽元皇太后越日太后敬謝太廟武宗更緣廣恩意詔赦天下仁宗踐位加上尊號曰全德泰寧福慶皇太

后英宗初立尊爲太皇太后上尊號曰徽文崇祐太皇太后是日御大明殿受朝賀越日以禮成復告廟元世諸后自非臨朝雖儷宸極其光耀莫有比焉初遷懷州苦毒夕喧無寐旦使近侍戒曰吾母子方憤憤蠹忍惱人耶其無復鳴後其地蠹無聲居東朝頗仁儉宮女皆教治女工每幸上都必敕鷹坊衛士先往母害民稼然性敏給有權數佐歷三朝威福已出姦佞蒙導遂乃不復防制內則黑驢母亦烈失入用事外則幸臣失列門紐鄰及丞相鐵木迭兒相率暴躪無憚以至箠辱平章張珪等紊敗綱紀仁宗每恐傷太后意不窮問容忍及

英宗立羣倖誅而後秕政始絕仁宗崩時太后以武宗長子和世疎頗英偉而英宗柔懦羣小亦以立明君爲不利己乃共擁立之旣立太后來賀見帝剛斷見於色輒悔曰我不擬養此兒遂飲恨成疾至治二年九月崩在位十六年明年上尊諡祔順宗廟順宗爲皇孫時世祖嘗賜以女侍郭氏生衛王阿木哥仁宗朝衛王再以罪貶見宗室傳

武宗宣慈惠聖皇后翁吉刺氏諱眞哥魯王按陳裔孫脫憐子迸不刺之女至大三年正月冊爲后無子仁宗皇慶二年立長秋寺掌皇后宮政秩三品泰定四年某

月崩在位二十年八月上尊諡翁吉刺氏世尊貴間以功名顯后祖父脫憐世祖時授河西王府千戶賜驛券圓符各四以兵守朔方客魯連地二十四年從族父濟寧郡王帖木兒征叛王乃顏有功賜號拔都卒迸不刺嗣卒后兄買住罕嗣買住罕尙王女拜荅沙公主生女二後爲泰定帝妃卒弟孛羅帖木兒嗣亦尙王女泰定二年以金印封毓德王益貴寵其女後爲順帝后而買住罕孫阿失復襲千戶順帝元統二年詔立武宗廟后主丞相伯顏與羣僚議曰先朝以眞哥皇后無子不爲祔廟今所當祔者其明宗母抑文宗也時帝爲明宗長

子伯顏意有在而羣臣亦依違莫決太常博士遂魯曾對曰真哥皇后早膺冊寶則文明二母皆妾也今以無子之故不爲立主而以妾母爲正是爲臣而廢先君之后爲子而追封先父之妾於禮不可昔燕王慕容垂卽位追廢其母后而尊其生母配享先王爲萬世笑豈宜復蹈其失乎集賢學士陳顥素疾魯曾乃曰唐太宗冊曹王明之母爲后是亦二后也奚爲不可魯曾曰堯之母爲帝嚳妃堯立爲帝未聞尊爲后以配嚳皇上爲大元天子不法堯舜而法唐太宗耶唐太宗初欲立曹王明母爲后魏徵諫止無冊立事後未嘗論祔食顥蓋妄

爲駁難其言不倫而眾亦是魯曾議於是升祔禮定以后配焉武宗又有速哥失里皇后魯王按陳從孫哈兒只之女后從祖姑也亦無子崩年與諡俱失

武宗仁獻章聖皇后亦乞烈氏諱壽童又曰壽章世祖皇子安西王忙哥刺女奴兀倫公主所出初爲帝妃生明宗天曆二年追上諡號順帝至正六年改諡曰莊獻嗣聖未上

武宗文獻昭聖皇后唐兀氏諱闕亦帝妃生文宗天曆二年追上諡號武宗又有完者歹皇后氏失有妃洪氏不知所由進最有寵專房宴帝嘗於仲秋月夜與眾嬪

御泛舟太液池設女軍夾以數船冠服旗旛瑰奇詭麗
游遨久之令女軍互衝擊爲戲既歌謳乃罷太液池在
萬歲山北舊名瓊花島山頗崔嵬窈窕引金河水至陟
復機巘上巔出石龍口注方池伏流至山半仁智殿後
有石琢蟠龍昂首歆出東西流入池山上有廣寒殿山
前有白石橋長二百尺晶瑩如玉迤至池中坻上東爲
靈囿多蓄珍禽奇獸始金人望氣者言塞上一山形勢
雄偉有王氣乃通好詭求得之大發卒徒剽鑿輦運至
燕累石爲山濬廣川植花木繕宮殿爲游幸所至元四
年世祖自開平徙都興築宮城而山適闌入賜今名車

駕歲巡上都必先宴百官於此成宗繼體多疾佚樂尙
簡自武宗頗事侈游其後順帝日以荒娛沈溺詭麗遂
至亡國云

仁宗莊懿慈聖皇后翁吉刺氏諱阿納失失里亡其世
系生英宗皇慶二年三月立爲后上冊寶遣官祭告天
地於南郊及太廟改典內院爲中正院秩正二品先帝
崩英宗卽位追上尊諡祔仁宗廟冊曰至孝所以揚親
易名所以表行矧爲天下母而養弗逮履天子位而報
則豐又曰昊天不弔景命靡常詞極悲痛云仁宗又有
荅里麻失里皇后氏失

英宗莊靜懿聖皇后亦乞烈氏諱連哥八刺成宗昌國大長公主益里海牙女也祖父忽憐尙憲宗公主屢征合荅罕胥克父阿失從討篤哇有功父子皆封昌王見公主傳至治元年二月冊爲后無子泰定四年六月崩在位七年隨上尊諡英宗南坡之變典禮闕如順帝至元二年始與武宗明宗后祔廟英宗又有牙八忽都魯皇后朶兒只班皇后皆不知所終

顯宗宣懿淑聖皇后翁吉刺氏諱普顏怯里迷失成宗同母兄晉王甘麻刺元妃泰定帝母也泰定帝卽位尊皇考爲帝廟號顯宗追上妃諡號文宗天厯初詔毀后

室顯宗又有妃子二曰拜拜海曰忽上海氏竝失

泰定帝八不罕皇后翁吉刺氏魯王按陳孫幹畱察兒之女泰定元年三月冊爲后二年封后父爲威靖王初后侍帝藩邸生王子阿速吉八元年立爲皇太子帝崩丞相倒刺沙立爲帝尋敗文宗入立詔徙后東安州崩年失帝又有皇后七人曰亦憐眞八刺曰忽刺曰也速曰撒荅八刺曰卜顏怯里迷失曰失烈帖木兒曰鐵你亦憐眞八刺皇后亦乞烈氏昌國大長公主益里海牙女二年帝嘗與后受佛戒於帝師撒荅八刺皇后帝姊壽寧公主女也三年納之宮中先崩餘無考文宗時太

平王燕鐵木兒嘗娶帝后爲夫人其名亦佚又妃二人曰必罕曰速哥荅里皆翁吉刺氏千戶買住罕女也天曆初俱徙東安州

明宗八不沙皇后泰定帝甥壽寧公主之女乃馬真氏侍帝潛邸生寧宗天曆二年帝稱制於和林而文宗已正位大都自往迎至旺忽察都地帝暴崩於是文宗復踐阼是年立寧徽寺掌后宮事又奉后鈔萬錠帛二千匹供費用后悉出命帝師率羣僧爲帝修佛事於大天源延聖寺七日又命道士建醮於玉虛天寶太乙萬壽四宮及武當龍虎二山至順元年復詔有司供后宮幣

二百匹四月文宗皇后與宦者謀弒后尋崩在位二年後至元二年祔廟

明宗貞裕徽聖皇后罕祿魯氏諱邁來迪郡王阿兒廝蘭之裔初明宗爲周王時北行其部納焉生順帝文宗旣復位內忌以明宗言帝非己子自高麗遷廣西命奎章閣學士虞集草詔告中外事見紀後卽位至元二年追上妃諡號或曰順帝故宋主瀛國子焉明宗又有后六人曰按出罕曰月魯沙曰不顏忽都曰野蘇曰脫忽思曰阿梯里行氏皆無考脫忽思皇后嘗主明宗幄殿至順二年賜湘潭戶四萬爲湯沐云

文宗不答失里皇后翁吉刺氏順宗女魯國大長公主
祥哥刺吉所出祖父帖木兒父駙馬都尉瑀阿不刺皆
封魯王見公主傳天歷元年立爲后二年二月授冊寶
生皇太子阿刺忒納荅刺早薨又生燕帖古思太平訥
二皇子后篤信釋教嘗以銀五萬兩助建大承天護聖
寺又賜籍沒張珪家田四百頃然性頗明察任重至順
三年八月帝崩丞相燕帖木兒請立燕帖古思后不從
帝大漸時命傳位明宗子明宗長子時遷外次子懿璘
質班畱京師后於是宣帝讓志立焉是爲寧宗甫七歲
后同聽政是年冬奉冊寶尊后爲皇太后御興聖宮受

朝賀踰月幼帝崩燕帖木兒復請立燕帖古思后曰天
位至重吾子尙幼明宗長子妥懽帖木爾在廣西今十
三歲矣理當立乃詔迎至約後傳位燕帖古思若武仁
故事明年六月卽位是爲順帝改元元統元年爲皇太
后置徽政院設官三百六十六員二年上尊號曰贊天
開聖仁壽徽懿昭宣皇太后至元二年冬復上尊號曰
貞文慈佑儲善衍慶福元太皇太后仍稱制臨朝先議
尊爲太皇太后參知政事許有任諫以爲非禮不聽時
南臺御史秦不花亦奏以叔母不宜加徽稱后初聞之
怒徐曰風憲有臣如此可謂能守祖宗法矣賜金幣以

旌其直六年六月詔以文宗篡立義不戴天后亦離間骨肉無德徹文宗廟主削後尊號安置東安州并流燕帖古思於高麗后尋崩在位十三年文宗固不弟有罪后亦不能無議然以一婦人當神寶虛位舍其愛子援立不震割情蹈義非由箝制一旦反覆且使母子俱危雖怵利害追緣釁聞報之亦爲酷矣讐固當復罪亦宜差魯桓衛成時或隱責焉

寧宗荅里也忒迷失皇后翁吉刺氏世系失至順三年十月帝卽位立爲后時年甚幼至正二十八年崩在位三十六年祔寧宗廟

順帝荅納失里皇后伯牙吾氏太平王燕鐵木兒女也至順四年六月帝卽位七月立爲后是年冬改元元統二年授冊寶帝立非燕鐵木兒意而后頗有寵后性媚黷貨時詔立鹽局官自賣鹽后亦命宦者孛羅帖木兒取鹽十萬引入中政院帝後又命發兩艘船下番爲后營利至元二年后兄左丞相唐其勢與太師伯顏爭權坐謀逆誅后弟塔刺海逃入宮匿后坐下后以衣蔽之左右曳出斬首血濺后衣伯顏奏曰豈有兄弟爲逆而后黨之者遂併執后后呼帝曰陛下救我帝畏伯顏又以大義乃曰汝兄弟爲逆豈能相救於是遷出宮伯顏

尋進鳩弒后於開平民舍在位三年

順帝伯顏忽都皇后翁吉刺氏武宗宣慈惠聖皇后之姪毓德王孛羅帖木兒女也後至元三年三月冊爲后生皇子真金二歲而天后性簡重節儉不茹忌動中禮法待妾媵太子皆極有恩意時第二皇后奇氏有寵居興聖西宮帝希幸東內左右或以爲言后無纖微怨望見言色從帝巡上都次中道一夕帝欲臨幸使內官馳告后不可曰暮夜非至尊往來之候中使往復者三竟不納帝益賢之至正十四年后母歿帝頗加禮賻鈔三百錠后居坤德殿終日端坐未嘗妄踰闕閤二十五年

八月崩年四十二在位三十一年奇氏后見后遺衣質敝曰正宮所服何至斯耶輒非笑之踰月皇太子自太原歸哭極慟云

順帝完者忽都皇后奇氏高麗人其家微也故事高麗國歲獻媵妾于是徽政院使禿滿迭兒進爲宮女主供茗飲尋見寵幸生子愛猷識理達臘後立爲皇太子時荅納失里皇后方驕妒知當帝意數箠辱之及后遇害帝欲立焉丞相伯顏爭不可伯顏罷學士沙刺班希旨請立爲第二皇后居興聖宮改徽政院爲資政院后爲人猿黠知辯務自矯飾無事則取女孝經史書訪問歷

代皇后有賢行者爲法四方貢獻珍味非薦太廟不敢先食京師嘗大饑命官作糜粥以賑又出金銀粟帛令宦者朴不花於都城十一門置冢瘞遺幣十餘萬復命僧建水陸大會度之太子旣長帝爲建端本堂命儒臣教授國法帝與太子多受佛戒帝師因啟后曰太子向學佛法頗開悟今乃使習孔子教恐壞真性后曰我雖居深宮不明道德嘗聞自古及今治天下者須用孔子道舍此則爲異端佛法雖好不可以治天下安可使太子不讀書帝師慙退其後正位中宮誕日百官進箋后誠左丞相沙藍荅里曰自世祖以來正宮皇后壽日未

嘗進箋近年雖有不合典禮卻之后善折人外輒亮謹如此帝日昏懦怠棄政治后久窺伺與太子遽謀內禪使朴不花喻意丞相太平太平不荅復召至宮舉酒賜之達前說太平依違而已帝亦知后意怒疏之兩月不見然后頗盜威柄殺罰由己朴不花有罪被劾后諷御史大夫佛家奴爲疏辨佛家奴謀再劾后用喉御史轉奏謫潮河后族奇氏在高麗者怙勢驕橫高麗王伯顏帖木兒怒盡殺之后與太子謀復讐乃廢高麗王立其弟塔思帖木兒畱京師者爲王以奇族子三寶奴爲元子同知樞密院事崔帖木兒爲丞相將兵萬人并倭國

兵送之至鴨綠江爲伏兵所破餘七十騎還時中書平章政事孛羅帖木兒鎮大同與太子有怨帝亦憤其跋扈下詔暴其罪命太尉擴廓帖木兒討之孛羅帖木兒遂再舉兵犯闕錄軍國重事怒無所發又欲立威迫脅令監察御史武起宗言后多撓國政宜遷外帝弗聽遂矯制幽於諸色總管府使其黨姚伯顏不花守之太子先奔太原尋逼后入宮取印章僞爲書以召復幽后舊所后數納美女求脫至百日始釋孛羅帖木兒誅死太子還后又密令擴廓帖木兒以重兵擁入劫帝禪擴廓帖木兒知其意將至京師散遣其軍陰謀遂沮帝旣不

絕后会伯顏皇后崩中書省又以太子故請后正尊位又奏改資政院爲崇政院兼主中政院帝初不許俄授冊寶進爵奇氏三世爲王至正二十五年十二月也先是元統閒立爲第二皇后監察御史李泌言世祖誓不與高麗共事陛下踐世祖之位何忍忘世祖之言乃以高麗女竝位中宮今災異屢起河決地震盜賊滋蔓皆陰盛陽微之漸乞仍降爲妃庶使三辰定位災異可息元初稱西夏高麗不舉其國舉其部曰唐兀氏肅良合氏至是乃以后爲肅良合氏詔天下二十八年明兵破大都從帝北奔其後事史失帝多內嬖其妃嬪可考者

有龍程張戈支祁氏又有寵姬二皆明麗善歌舞龍妃尤貪酷帝賜縉綺率纂組奇瑰與他珍異動以鉅萬妃令宦者貨於左掖門內售者輻湊至名其地曰繡市帝善飾宮觀又爲龍舟長十餘丈廣二丈上列五殿楹案鱗鬣皆傳以金舟行則龍形俱動中爲宮漏藏壺匱中匱上立三聖殿旁設玉女時至輒浮水上籌左右列金人分佩鐘鈺及夜機發隨漏以擊日娛樂無厭後昵番僧淫穢益甚更爲天魔等舞雜以男女姚冶百出內外益大亂揆其政刑隳敗不具緣帷闔而骨肉生心啟釁召寇寢至凌遲莫救則奇氏后或爲之導焉

贊曰女子之行自非上智聰哲通達乎詩書禮誼苟藉尊寵罔不縱恣而險詖賊盭特又甚焉材智修飭之士一旦貴顯猶或讒媚伎害奸冒國紀何況後宮資識昧淺侍至尊求親幸地近勢崇情錮玩蓄其不交煽以至傾敗哉元世后妃行懿質謹志議明焯不侈靡者自烈祖至順帝不過六人其圖專政柄覬覦非分幾速莽操之禍危殆什百臨朝則莫若奇氏后而或謂非陰鄧之家無德禮之教抑知一遇詭譎則向之繩矩皆其羽翼哉英明之君未猶蔽惑其於順帝何責焉然則宮禁之不立制度之不修寵遇無節患積隱微自古然矣吁可

不慎歟。與之不計。豈無所患。其所以不立公主列傳。蓋其治之本乎。自帝姬以至庶女。爵秩儀服。大懸絕矣。而納采問名。親迎盟饋。諸禮雖文質。隆殺之不同。所以抑驕亢。修孝敬。慎德容。以成子姓。無貴賤一也。詩云。曷不肅雝。王姬之車。又曰。平王之孫。齊侯之子。言王姬能宣平正之德。以成肅雝之道。其異于諸侯女者。唯是車服也。春秋云。王姬歸于齊。王姬之貴。猶曰歸者。明不以天子之尊而廢鈞匹之誼。又以彰柔順之教焉。古史書多述後宮矩度。休懿毀殆。公主行事散見各傳。

則以后妃參體。天王與國盛衰。而外戚俯張。輒緣亂政。皇女雖親。亦外母家者也。范蔚宗纂述漢史。頗敘其封年。下降附后紀。至宋祁修唐書。迺始哀輯爲傳。平陽固功。參佐命。分定京師。太平安樂。皆極僭侈。專廢立。參軍國。干冒至死。其他賢否。頗可資世勸戒。云爾。而冊封節文。亦盛于唐。自是史家多立傳。遂與諸王侔矣。元世公主無他淑慝。異眾。僅食歲賜。郡國封號。多出追贈。又不立官屬。其禮殺矣。舊史別爲一表條。其世系族姓。雖閒疏譌。而文約義明。體誠勅言。實順也。然考其下嫁。蒙古則翁吉刺。亦乞烈幹。亦刺三家。色目則汪古。高昌。二部漢人。

則高麗國或無可考者大約不離此部族而支屬紛紜
尊卑迭降又王女亦稱公主益無統別其先雖無奇功
懋績然或賓附攻討位廁通顯再傳後閒立軍功率席
餘寵婚連天室而已其勳系既完而公主所出亦具悉
爲附麗著錄俾其世次官氏可考嗚呼漢唐多飾宗女
和親唐或度爲道士資親冥福元則部落悉臣雖崇釋
老而主無詭行男女正位風教微矣然制輒優於前代
此又不可略焉舊史表有公主名無世系又闕其所降
氏族或無主名與下降度皆王女今亦附於後云
烈祖一女

昌國大長公主帖木倫太祖同母媼也下嫁孛堇亦乞
列思氏善騎射初太祖陰使朮赤台他適過其居野兒
古納河孛堇心知之會日暮畱止宿殺羊以食見馬乏
資以良騎使還復加禮焉朮赤台具以告帝大喜欲召
尙主而孛堇亦使來請婚帝問孛堇孛堇蓄幾何對曰有
馬三千匹請以半爲聘帝曰婚姻論財商賈也昔人有
言同心實難我方欲平定天下汝等隨孛堇效忠可也
因以主歸之時帝初爲合罕已而札木合以帝部曲射
殺其弟合兵三萬入寇孛堇既遣波欒歹磨里孛堇入
告復率宗人擊掠其輜重後爲火魯刺部所逼走會帝

征脫里與帝遇同飲班朱泥河水脫里平召以兵會討
乃蠻大戰破之主薨帝復妻以己女火臣別吉公主而
火魯刺部已降乃命其長哈兒八台子也可忽林圖帶
弓矢爲媵臣哈兒八台曰吾兒豈爲人臣僕雖死不能
也帝令孛秃與戰悉斬擒之又帝先欲以主妻脫里孫
秃撒哈中止覺啟隨兵連至滅孛秃又從木華黎略地
遼東西以功封冠懿二州從帝征西夏病卒至治元年
贈推忠宣力佐命開國功臣太師駙馬都尉昌王諡忠
武子二不詳主所出帖堅干尙王女亦乞列思與茶倫
瑣兒哈事太宗爲萬戶南征攻嘉州破之使獻捷帝嘉

其父子宣力賜金錦金帶七寶鞍師還卒於道後贈宣
忠保大翊運開國功臣太師駙馬都尉昌王諡忠定鎖
兒哈尙太宗皇子幹赤女安秃生女爲憲宗后子札忽
兒臣從定宗出討萬奴有功太宗命尙濟南王按只吉
歹女也孫真卒贈推誠靖宣佐運贊治功臣太師駙馬
都尉昌王諡忠靖子二長月列台尙皇子賽因主卜女
哈荅罕生脫別台與乃顏戰有功次忽憐尙憲宗女凡
亦乞列思氏尙帝王女者十四人主下嫁者二十帝女
五各隨傳出自帖木倫下封號皆同未封者世祖女吾
魯真又宗女曰魯魯罕曰魯倫曰普顏可里美思曰奴

兀倫曰撒兒塔陳曰亦勤真
太祖四女

長曰火臣別吉大長公主下嫁李禿見前傳二十
高昌也立可敦公主下嫁巴而朮阿而忒的斤亦都護
亦都護者華言國王也畏吾氏其先世居畏吾地有和
林山二水出焉曰禿忽刺曰薛靈哥一夕有神光降於
兩河間樹中居民往候之見樹生癭若婦妊狀越九月
十日癭裂得嬰兒五異而收養之其最稚者曰布可罕
壯爲其長傳三十餘世曰玉倫的斤父曰月仙帖木兒
玉倫的斤最雄武與唐人數攻戰唐人苦之議和親以

金蓮公主妻其子葛勵的斤居和林別力跋力苔言婦
所居山也又有山曰天哥里干苔哈南有石山曰胡力
苔哈蒙古謂天曰騰格里福曰胡圖里山曰苔哈天哥
里云云者蓋言天山福山也唐使與相地者至曰和林
盛強以有福山也壞福山則其國可弱乃詭求得之山
石大不可動遂烈焚沃以醲酢碎輦去自山隴國中鳥
獸躑躅悲號若有所失者越七日玉倫的斤卒災異屢
見傳位者又數亾乃遷於交州交州者火州也統別失
八里地北至阿朮河南接酒泉郡東至兀敦甲石哈西
臨西番居是者百七十餘載至巴而朮阿而忒的斤素

臣事契丹爲其屬國四年間太祖興朔方遂殺契丹所置監國官將歸附而帝使適至大喜卽遣使入奏曰臣聞皇帝威德卽棄契丹舊好歸命聖朝請自今率所部爲臣僕當是時帝破蔑兒乞部射殺脫黑阿脫其子忽都赤刺溫將奔其國先以使通遂斬其使與大戰澹河以告六年朝於客魯連河奏曰陛下若恩顧臣使得與於四子末庶竭犬馬報帝感其言乃以主妻之而使序於諸子後從遮別征哈密力算灘回回諸國部曲嚴整所向皆克又從帝征你沙卜里西夏皆有功卒次子玉古倫赤的斤嗣卒子馬木刺的斤嗣將探馬赤軍萬人

從憲宗伐宋合州攻釣魚山有功還火州卒至元三年子火赤哈兒的斤嗣高昌尙主者四人主下嫁者六帝女二

扯扯亦堅公主下嫁亦納勒赤斡亦刺氏本西北部落後以部爲氏二年帝命木赤太子往征其部長忽秃阿別乞迎降道朮赤征服十四部帝嘉其先款附有功以主妻其次子而命其長子脫劣勒赤尙朮赤女火雷後其族有秃滿答兒尙世祖女孫脫脫灰順帝元統二年封爲英壽大長公主有別里迷失有沙藍有也不干皆尙宗女也不干封延安王主從其封凡斡亦刺氏尙主

六帝女一有封號者主王
趙國大長公主阿刺海別吉下嫁孛婁合汪古部人後
以部爲氏父曰阿刺兀思剔吉忽里蒙古有黑達達白
達達二部太祖爲黑達達部白達達卽汪古部也系出
沙陀雁門節度後遠祖卜國世爲部長金源氏塹山爲
界以限南北令以一軍守衝要扼諸國其西北有乃蠻
部長曰太陽見帝平脫里內忌約與俱攻分據其地時
部眾爭欲從獨心不可乃執其使奉酒六尊具以謀告
帝時朔方未有酒用祭而後飲三爵止曰是物少則發
性多則亂使還酬以馬五百羊一千詔以兵會先期至

旣破乃蠻從下中原復爲嚮道南出界垣帝令還鎮其
部爲先異議者所殺并害其長子不顏昔班其妻阿里
黑攜孛婁合與從子鎮國夜遁至界垣告守者緹以入
因避地雲中帝旣定雲中購求得之賜與甚厚以孛婁
合幼先封鎮國爲北平王後孛婁合從帝攻西域還年
十七襲封王尙主且詔世婚主明毅有智略車駕征伐
四出嘗攝畱守務軍國大事悉咨而後行部署多當孛
婁合未有子主爲進姬侍生子三鞠養有過已出孛婁
合先主薨大德九年以封諡其孫闊里吉思追封阿刺
兀思剔吉忽里爲高唐王諡忠武阿里黑爲高唐王妃

孛要合亦如之諡武毅主爲皇曾祖姑齊國大長公主
仁宗朝加贈孛要合宣忠協力翊衛果毅功臣太傅駙
馬都尉趙王主爲皇高祖姑進趙國而北平王鎮國子
曰聶古解尙睿宗次女獨木干憲宗朝略地江淮薨於
軍賜興州千餘戶進封郈王凡趙國尙主者十二人主
下嫁者十四帝女七封號同未封者睿宗女獨木干顯
宗女阿刺的納八刺又宗女二曰竹忽眞曰葉縣干眞
公主

太宗一女

唆兒哈罕公主下嫁魯忠武王按陳孫納合翁吉刺氏

自王子萬戶幹陳尙睿宗長女也速不花後號魯國大
長公主凡尙主者十二人主下嫁者十五帝女五封號
同順宗女祥哥吉刺宗女朶兒只班獨加美稱普納公
主封鄆安惟主與仁宗女闊闊倫又王女四曰拜塔沙
曰台忽普都曰幹可眞曰不魯罕未封

定宗二女

趙國大長公主葉里迷失下嫁君不花趙武毅王孛要
合長子也嘗從憲宗伐宋至釣魚山方環攻而宋卒乘
壁詬旁有坐者張蓋自若以爲矢石不及也君不花素
善鞭箭射之顛遂拔其壘卒贈趙王諡忠襄子三曰囊

家解曰邱鄰察曰安童囊家解尙主亦憐真封趙王諡忠烈邱鄰察尙主回鶻囊家解子馬札罕尙主桑哥不刺皆宗王女皆封趙王邱鄰察諡康禧

高昌巴巴哈兒公主下嫁火赤哈兒的斤亦都護巴而木阿而忒的斤曾孫也初嗣封時國爲海都兵亂百姓多入宗王分地詔遣始還集數年篤哇大舉兵來圍聲言阿只吉奧魯只諸王以三十萬眾攬我而潰汝敢以孤城當吾鋒乎對曰吾聞忠臣不事二主此城我生爲家死爲墓終不若從圍六月不降篤哇射書索女罷兵言勿許且亟攻會食盡慨然曰吾豈惜一女而不救

民命乎然吾不可與見因以茵藉其女縋出之始解去後入朝世祖嘉其忠詔尙主焉尋還火州屯於州南哈密力地北軍卒至以兵寡力戰死子紐林的斤方幼詣闕請兵復讐帝壯其志命尙太宗女孫不魯罕主薨又尙其妹八卜义有詔師出河西候與北征大軍齊發遂畱永昌吐蕃寇亂又令以平章政事領其部探馬赤軍萬人鎮守威德甚著武宗召還嗣爲亦都護賜金印仁宗始稽故實封爲高昌王別賜金印立王府官其王印行諸內郡亦都護印則行諸畏兀兒地主薨又尙安西王阿難荅女兀刺真延祐五年薨子二長曰帖睦兒補

化次日錢吉八卜义公主所出帖睦兒補化大德中尙
闕端太子女孫朶兒只思蠻至大中從父入覲備宿衛
又事皇太子領大都護事出爲鞏昌等處都總帥達魯
花赤奔父喪永昌讓爵於季父欽察台弗許詔嗣立至
治中與喃荅失里同領甘肅諸軍仍治其部泰定中召
與威順王寬徹普化等分鎮襄陽拜湖廣行中書省平
章政事文宗又召至汴以左丞相畱守尋入平內難錄
軍國重事知樞密院事天歷二年拜中書左丞相加太
子詹事讓爵於弟改御史大夫先官湖廣時有左丞與
忤其人後有罪當死爲堅請釋之人服其量子二長曰

不荅失里尙王女阿哈也先忽都拜中書平章政事仍
嗣封薨子和賞嗣鎮甘肅元亾降於明次日伯顏不花
的斤官江東廉訪副使死事甚烈見忠義傳

睿宗二女

也速不花公主見太宗女峻兒哈罕公主傳

獨木干公主見太祖女趙國大長公主傳

憲宗一女

昌國大長公主伯牙倫下嫁忽憐昌王札忽兒臣次子
也未幾主薨世祖時脫黑帖木兒叛命忽憐討敗之帝
嘉其績復詔尙憲宗女孫不蘭奚宋平封以廣州帝親

征乃顏薛堅徹等與其將哈荅罕屢戰未克召忽憐助擊時方大戰於程火失溫地忽憐卽以兵二百衝突敗之哈荅罕度猱河遁踰年復命往征大破於曲列兒塔兀兒兩河間多踰河走餘百人叵匿山谷忽憐率少兵步追薛徹堅力阻不聽竟殪其眾後歲餘進擊遇哈荅罕於兀刺河率千人夜襲殲之賜號拔都至治元年贈效忠保德輔運佐理功臣太師駙馬都尉昌王諡忠宣子阿失事成宗大德五年從晉王武宗擊破篤哇於哈刺荅山大斬獲射篤哇中膝號哭遁武宗賜以衣成宗加賜珠衣至大元年封昌王賜金印立王府官屬仁宗

朝復賜食寧昌縣戶初阿失尙宗女撒兒塔陳繼尙成宗女益里海涯生女爲英宗后泰定帝妃又尙憲宗曾孫女買的子七長八刺失里嗣尙主烟合泰定元年命鎮阿難荅所居地薨子沙藍朶兒嗣尙主月魯八刺失里弟失刺渾台尙吳王木南子女亦勤眞英宗時追贈孛禿下與諸長公主后母等泰定帝順帝封買的月魯二公主曰皇妹皇姊買的賜銀印

世祖四女

吾魯眞公主下嫁孛花昌忠宣王忽憐從弟也孛花弟鎖郎哈尙安西王忙哥刺女奴兀倫生女爲武宗妃是生

明宗峻都哥尙宗女魯魯罕又尙魯倫至正二十三年封寧昌郡王賜龜紐銀印薨子不鄰吉歹嗣亦尙宗女普顏可里美思

魯國大長公主囊加真下嫁斡羅陳魯忠武王按陳孫萬戶納陳子也納陳尙太祖女孫從憲宗伐宋攻釣魚山又從世祖南涉淮甸平山東後北伐阿里不哥以其子哈海脫顏斡羅陳等十人從至莽來由失木魯追擊至孛羅克禿地白旦及夕斬首萬級功爲最卒子斡羅陳襲初尙宗女完澤主薨世祖妻以己女斡羅陳卒無子弟帖木兒襲復妻主至元中以從征乃顏功封濟寧

郡王賜白傘蓋寵之復討叛王哈丹禿魯干由龜刺兒河轉戰至惱木連河殲其衆賜名按荅兒禿那顏卒子瑯阿不刺桑哥不刺幼弟蠻子台嗣封主復嫁焉成宗卽位封主爲皇姑魯國大長公主改封蠻子台爲濟寧王賜金印與銀七萬有奇又賜鈔千錠爲主建佛寺於應昌路蠻子台嘗私殺罪人御史臺劾其專擅帝止下其章示告而已後受詔討海都篤哇軍遇未陳單騎突入往復衝擊敵大擾一戰遂捷時武宗以親藩鎮朔方用命蠻子台統蒙古軍民官輔王守莽來遏北寇主薨繼尙裕宗女喃哥不刺先是宏吉刺部族居苦烈兒溫

都兒斤迭烈木兒野里古納河地太祖九年詔定按陳
與其弟火忽冊等農土農土蒙古言經界也自苦烈兒
溫都兒斤與按陳及帝弟哈撒兒爲界而命按陳居可
木兒溫都兒荅兒腦兒迭蔑可兒地命冊居阿刺忽馬乞
迤東蒜吉納禿山木兒速拓哈海幹連直至阿只兒哈
溫都哈老哥魯地其地以胡盧忽兒河北爲鄰按赤台
爲界又自哈老溫迤東塗河潢河間火兒赤納慶州地
與亦乞列思爲鄰賜火忽又自按陳賜地可木兒溫都
兒迤東絡馬河至於赤山塗河迤南與國民爲鄰賜其
子唆兒火都至元七年幹羅陳與主請於朝曰臣所受

上都東北三百里駐夏地名荅兒海子願立城邑詔可
城成賜名應昌府後升爲路元貞元年主與蠻子台復
請於應昌路東七百里駐冬地築城從之其地初名金
州因升爲府後改爲路當元貞初其所分燕南地則濟
寧路濟兗單三州鉅野鄆城金鄉虞城碭山肥城任城
魚臺沛單父豐嘉祥滋陽寧陽曲阜泗水十六縣又汀
州路長汀寧化清流武平上杭連城六縣至大元年武
宗益賜永平路灤州盧龍遷安撫寧昌黎石城樂亭六
縣明年又賜平江稻田一千五百頃凡賜邑任家臣爲
達魯花赤而應昌全寧二路則自達魯花赤總管以下

官悉置焉又立王傅府自王傅六人下其屬有錢糧人匠鷹房軍民軍站營田稻田烟粉千戶總管提舉等官以署計者四十餘以員計者七百餘按陳第冊與子峻兒火都諸孫孛羅沙伯顏蠻子添壽不花火都不花掌吉七人阿哈駙馬孫也速達兒皆官蒙古軍站千戶其五戶絲金鈔數濟寧路則三萬戶汀州路則四萬戶絲以斤計者歲二千二百有奇鈔以錠計者一千六百有奇名曰歲賜外戚寵異元世最盛云而帖木兒子瑯哥不刺大德十一年襲萬戶賜金印封魯王尙順宗女祥哥吉刺武宗時號皇妹魯國大長公主賜食永平路賦

更欲賜其路鹽課中書諫止仁宗立進號皇姊生女爲文宗后文宗賚子不貲先後賜淮浙山東河閒四轉運司鹽引六萬爲湯沐費又諭侍臣曰皇姑魯國大長公主蚤寡守節鞠育遺孤子襲王爵女配子一人其在庶民家有司猶表揚勵仁矧屬懿親而可闕乎於是議加封曰徽文懿福貞壽大長公主又爲營居第命平章亦列赤護視而令丞相燕帖木兒頒鈔於其第至順二年薨子阿里嘉室利襲萬戶嗣魯王尙宗女朶兒只班至順閒封曰肅雍賢寧公主桑哥不刺幼時世祖命養於火忽孫不只兒妻幹可眞成宗時尙王女普納至順閒

封鄆安王賜金印主封同順帝初授萬戶進封魯王
齊國大長公主忽都魯揭里迷失下嫁高麗王王哱至
元八年其父王禎遣使爲世子請婚世祖許之十一年
五月歸焉哱初名懜更名睿表改今名十五年賜駙馬
高麗王印成宗卽位封主爲皇姑安平公主元貞二年
史臣進所譯世祖實錄帝曰忽都魯揭里迷失非昭睿
順聖太后所生何爲亦稱公主古帝女號同不以后妃
異又元世王女與帝女無殊稱不知帝奚以詰焉時史
官亦唯阿而已子璋尙顯宗女薊國大長公主卜荅失
利生子燾初尙營王也先帖木兒女濮國長公主亦憐

只班繼尙魏王阿木哥女曹國長公主金童燾弟曷尙
梁王松山女名佚璋初名源至大三年封瀋王皇慶二
年遣歸國璋請以長子燾嗣高麗王從子曷嗣瀋王故
璋與曷稱瀋王云

趙國大長公主月烈下嫁趙武毅王孛要合次子愛不
花中統初統兵討阿里不哥敗其黨闕不花於按檀火
爾歡地三年圍李壇濟南獨當一面賊不得出又從征
西北叛王俘獲甚衆卒贈高唐王加贈趙王諡武襄弟
拙里不花鎮雲南卒子火思丹尙宗女竹忽眞愛不花
四子皆主出

裕宗一女

喃哥不刺公主見世祖女魯國大長公主傳

成宗二女

長女昌國大長公主益里海涯下嫁昌王阿失見憲宗公主傳

趙國大長公主愛牙迷失下嫁闊里吉思趙武襄王愛不花長子也性勇毅而好學聚經史築萬卷堂於私第凡性理陰陽術數諸學靡不綜貫世祖時宗王也不干叛率精騎千餘晝夜追及時方暑將戰北風大起眾請少止闊里吉思曰當暑而風天贊我也策馬陷陳騎士

隨擊大破斬之也不干以數騎遁去闊里吉思亦身中三矢斷其髮成宗卽位封高唐王賜金印時西北諸王多不庭固請往征將行矢曰此行不靖邊陲吾不旋轡大德元年遇敵於伯牙斯地左右欲俟大軍至與戰闊里吉思不可曰大丈夫爲國死敵奚待人爲卽整兵鼓譟進大敗之擒將卒百餘人以獻詔賜世祖所服貂裘寶鞍及繒錦介冑兵器有差明年秋諸王將帥以敵被創又往歲冬不出議且休士闊里吉思曰今秋候騎來者甚少所謂鷲鳥將擊必匿其形備不可緩獨嚴兵以待是冬果大至三戰三克乘勝逐險後騎不繼馬蹟被

執誘使降不屈又欲妻以女曰我帝婿也敵不敢逼帝嘗遣其家臣阿昔思伺之見於眾中輒先起居兩宮次問嗣子如何言未畢爲左右引去竟不屈死九年追封高唐忠獻王加贈推忠宣力崇文守正亮節保德功臣太師駙馬都尉趙王闕里吉思先尙裕宗女忽荅迭迷失皆封齊國至是改趙國子术安幼詔以弟术忽難嗣封术忽難初尙葉縣干真繼尙阿失秃魯兩宗女才識英偉善撫御其眾痛其兄爲敵幽死教養术安過於己子命家臣謹厚者主其兄珍服祕玩及术安成立悉以付焉至大二年加封趙王表讓术安薨贈郇王諡忠襄

三年术安嗣封尙顯宗女阿刺忒納八刺一日謂王傅脫歡司馬阿昔思曰先王旅殯卜羅神靈無依吾痛心欲死若得歸葬先塋瞑目無憾二人以聞帝嗟悼良久曰孝子也卽令脫歡子失忽都等十九人乘傳往賜道路費復詔大臣以兵五百護至殯所奠告啟視尸體如生遂得歸葬薨贈太師諡簡穆其後有嗣封者部眾叛欲害之家臣昔班帖木兒與妻刺八以己子觀音奴服王衣冠居宮中夜與王遁賊至殺其子事聞至正十八年授昔班帖木兒同知河東宣慰司事刺八雲中郡夫人贈觀音奴同知大同路事竝表其閭闕里吉思弟阿里八

解亦耽儒業尙宗女奴兀倫公主

順宗一女

祥哥吉刺公主見世祖女魯國大長公主傳

武宗女闕

仁宗一女

闊闊倫公主下嫁脫羅禾特薛禪孫脫羅禾初尙宗女

不魯罕

英宗女闕

顯宗三女

壽寧大長公主泰定中封名佚下嫁乃馬真氏亦失其

名

薊國大長公主卜荅失利下嫁高麗王王璋見世祖女

齊國公主傳

阿刺忒納八刺公主下嫁朮安見成宗女趙國公主傳

泰定帝女闕

明宗一女

明惠貞懿大長公主不荅昔思其下嫁慶王剛哈刺咱

其氏失泰定四年賜賚戶鈔四千錠至正元年加封號

元統初剛哈刺咱墜馬上都得奇疾目睛俱無而舌出

至曾醫不能療時廣惠卿聶只兒扈從上都識此病用

器翦去舌有頃復出復翦之又於舌旁皆去一指許傳
以藥遂愈廣惠司者回回諸醫隸焉聶只兒也里可溫
人刃夫家室四子顯親以恩四子顯至五子半賦桂器
文宗女闕大長公主下嫁昔思其不察王圖魯陳師
順帝女闕

禿滿倫公主下嫁赤窟瓮吉八忽公主下嫁赤窟孫懷
都采真公主下嫁懷都弟愛不哥鄆國大長公主忙哥
吉下嫁愛不哥子寧濮郡王昌吉鄆國大長公主桑哥
不刺下嫁昌吉弟岐王脫脫木兒大德十年賜金印皇
慶元年立濮陽王府王傳官四員九月進封是年賜主

金印復賜食西寧州租稅延祐四年加稱皇姑賜金銀
鈔幣有差札牙八刺公主下嫁其族名逸

阿昔倫公主下嫁阿脫搠思蠻公主下嫁阿脫弟忽都
虎

獨木罕公主下嫁察忽伯要真公主下嫁察忽子也先
也里侃公主下嫁也先子迭木迭兒

帶魯罕公主下嫁拔都搠思蠻公主下嫁拔都子阿木
魯

脫列公主下嫁阿爾思蘭子也先不花八八公主下嫁
也先不花子忽納荅兒鐵某公主下嫁忽納荅兒子刺

海涯里那

完者台公主下嫁來寧王卯澤

右皆王女其世系與下嫁氏族史闕惟二主有封號

公主某下嫁塔出主某下嫁塔出子木真伯主某下嫁

木真伯子別合刺主某下嫁別合刺子塔八

公主某下嫁忒不歹主某下嫁忒不歹曾孫塔賽主某

下嫁塔賽子哈丹主某下嫁哈丹子朶忽

公主某下嫁合納那顏孫奔忒古兒

公主某下嫁白蘭王瑣南藏卜至治元年封後為浮屠

泰定四年復仕爵如故

公主某下嫁大理總管信苴段慶封宣武將軍

右皆王女其名與世系下嫁氏族自宣武將軍外史闕

都無封號

拜忽公主中統四年給符節

韓國公主普達實憐皇慶元年賜鈔萬錠

買買公主

阿刺歹公主

木荅里公主

雪雪的斤公主

阿失禿公主

木復居文集

附

休復居文集
失憐荅里公主

右皆王女其世系下嫁無考

贊曰位不期驕祿不期侈自古宗室諸王驕淫僭亂猶
干禁令區區保母之訓而欲抑其華衍不至陷溺克成
女士難矣元世公主言行志節無大奇異亦無盜竊威
福惟囊家真茂禮屢嫁爲可譏焉易曰闕觀利女貞又
曰婦子嘻嘻失家節也皇女誠尊亦奚以越哉

休復居文集

附一卷



休復居詩文集吾師生甫先生所著先生在日詩文率
多草藁無編寫者歿後明年克家至嘉定從先生家求
遺藁叢雜無次詩又特甚旣悉爲甄錄凡各六卷今黃
丈所刊者是已先生撰元書雖未竟按與李申耆書中
明言諸表皆定又言成攷辯數卷其書當存于家而孤
子久病家惟稚孫無緣索得乃僅以所見后妃公主二
傳附文集後檢校斯編輒增山木悲云道光二十四年
五月初一日元和陳克家謹跋

經